

déi Lénk

Léif Komrodinnen a Komroden,

Léif Gäscht,

Léif Frënn,

Als Virbereedung op meng Ried hunn ech mer ugelauschtert, wat d'lescht Joer op dëser Plaz gesot gouf. Deemools huet de Marc ugefaangen, andeems en eis alleguer vill Kraaft fir dat neit Joer gewënscht huet. Am Réckbléck hu mer déi Kraaft och gebraucht. Well 2016 war deelweis – entschëllegt den Ausdrock – e schäiss Joer.

Aleppo gouf zum Symbol fir all déi Plazen op der Welt, wou d'Bevëlkerung ënner mäerderesche Kricher leide muss. Mir hunn all live materlieft, wéi sech d'Situatioun ëmmer méi zougespëtz huet bis déi humanitär Katastroph perfekt war.

An den USA gouf e Mann mat Hëllef vu Rassismus a Sexismus, vu Gewaltverherrleschung a Ligen zum nächste President gewielt.

D'Britten hu sech opgrond vun Hallefwouerechten an Angschtmaacherei dozou entscheed, d'EU ze verlossen.

An hei zu Lëtzebuerg hate mer de Luxleaks-Prozess, wou den Antoine Deltour an de Raphael Halet an éischter Instanz zu Prisongs- a Geldstrofe condemnéiert goufen. 2 Whistleblower also, déi just ëffentlech gemaach hunn, wéi wäit Lëtzebuerg geet fir am internationale Steierdumping d'Nues vir ze halen.

An deem Prozess koumen dann esou aberwitzeg Geschichte raus, wéi z.B., dass PwC Bréifpabeier vun der Lëtzebuurger Steierverwaltung zur Verfügung hat fir schnell an einfach Rulingen ausstellen ze kënnen.

Normal, mat Steiervermeidung ass net ze spaassen, do zielt all gewonnenen Dag. Wa mer do ze lues sinn, kéint en anert Land kommen an eis keng Steieren virun der Nues ewech klauen.

A während viru Gericht sech zwee Whistleblower verdeedege mussen, well si opgewisen hunn, dass riseg Betriber mat enorme Beneficer quasi keng Steuer bezuelen, geet an der Gesellschaft déi sozial Schéier weider auserseen.

Den Aarmutsrisiko läit bei 16% an all Fënnefte riskéiert an der Tëschenzäit, Affer vun Aarmut oder sozialer Exklusioun ze ginn. Ëmmer méi Leit bleift um Enn vum Mount näicht méi iwwereg, well schon alleng de Logement d'Halschent vun hirem Loun frësst.

Fir deem entgéintzewierken huet d'Regierung eng Steuerreform op de Wee bruecht. Deene Leit, vun deenen ech elo grad geschwat hunn, hëlleft dat zwar net immens vill. Vum grouse Kuch kréie si just déi puer Grimmelen, déi vum Dësch falen.

Eng Steuerreform, déi zu méi sozialer Gerechtegkeet géing féieren, hätt ganz anescht missen ugepak ginn. Nee, hei hu mer et, kuerz virun de Wahlen, mat enger Tournée générale ze dinn.

Anescht kann een et net bezechnen, wann Paien bis zu 25 Dausend Euro de Mount dovu profitéieren. Wou ass do d'Stärkung vun der Mëttelschicht oder d'Ennerstëtzung vun den ënneschte Lounkategorien?

Dobäi kënnt, dass och nach lauter Steierkaddoen un déi grouss Betriber verdeelt goufen, sou dass dem Staat am ganzen iwwer 500 Milliounen Euro manner zur Verfügung stinn. Suen, déi eigentlech gutt géinge gebraucht gi fir wichteg Investissementer, zum Beispill an de Logement oder eise Sozialsystem, dee bei all Geleegeheet ofgebaut gëtt.

Well déi puer Grimmelen, déi fir déi normal Leit vum Dësch falen, gi bei wäitem net duer fir d'Austeritéitspolitik vun dëser Regierung während de leschte Joeren ze vergiessen.

Nach am Juni gouf d'Kannergeld gekierzt. An och déi geplangte Reform vun der Fleegeversécherung ziilt just drop of, d' Ausgaben ze reduzéieren.

Gläichzäiteg wiert sech d'Regierung awer dogéint, Steiere vun e puer honnert Milliounen, déi dem Staat zoustinn, ze kasséieren, wéi mer am Dossier Fiat erlieft hunn a warscheinlech deemnächst och am Fall Engie.

Bei Sozialleeschungen ze spuere fir spéider Steierkaddoen ze maachen ass eng Politik, géint déi mir eis ëmmer mat Hänn a Féiss gewiert hunn an och an Zukunft weider wäerte wieren.

Ma Kolleginnen a Kollegen,

Iwerhaapt huet dës Regierung, genau wéi déi virrecht, komesch Virstellunge vum Bild, dat Lëtzebuerg ausstrahle soll. Mir sinn net nëmmen a Steierfroen net d'accord, mä och wann et drëms geet, wien hei wëllkomm ass.

Mir hu schonn e puermol kritiséiert, dass verschidde Ministere sech ze vill op déi Ultra High Net Wort Individuals, wéi se sou schéi genannt ginn, konzentréieren an doduerch d'Realitéit, an där déi meescht Leit hei am Land wunnen, aus den Ae verléieren.

Riseg Luxusimmobilien dreiwën de Präisspigel enorm an d'Luucht a blockéieren de Wunraum, virun allem am Zentrum. Jonker a Leit ouni feste Wunnsëtz ginn aus de Stadzentre verdriwwen, well se net an d'Bild passen, dat soll vermëttelt ginn.

Mä de Clou kënnt mat deem neien Immigratiounsgesetz, dat an e puer Woche soll gestëmmt ginn.

An deem Projet de loi ass festgehal, dass eng Famill mat Kanner, déi op Lëtzebuerg kënnt, kann am Centre de Réention festgehale ginn, an zwar net méi, wéi bis elo, 3 Deeg laang, mä ganzer 7 Deeg.

Eng Famill mat klenge Kanner, déi also näischt falsch gemaach huet, ausser op Lëtzebuerg ze komme fir hei Asyl unzufroen, soll kënnen eng ganz Woch laang festgehale ginn.

Gläichzäiteg ginn am selwechte Projet de loi nei Kritären agefouert fir en Titre de Séjour ze kréien. Dee gëtt nämlech dann u jidderee verschenkt, deen tëscht enger halwer Millioun an 20 Milliounen Euro zu Lëtzebuerg investéiert.

Wie Fric huet, däerf bleiwen; wie vu Misère an Honger fortleeft, gëtt 7 Deeg agespaart an da rëm heem geschéckt. Dat ass Immigratiounspolitik à la Blo-Rout-Gréng. An eng Schan!

Verschidde Politiker wëllen d'Rechter vun engem Mensch anscheinend vu sengem Bankkonto ofhängeg maachen.

Ma net nëmmen an der Immigratiounspolitik, ganz allgemeng stellt sech d'Fro, wéi eng Visioun vu Lëtzebuerg déi grouss Parteien hunn.

Hinne schéngt et duerzegoen, sech op juristesche Ingenieurskonscht ze spezialiséieren, ob am Kader vum Steierdumping oder neierdénks am Space Mining. Well, si mer éierlech, et kann nach esou spannend kléngen, mä schlussendlech handelt et sech beim Space Mining ëm näicht aneres wéi eng weider Iddi, wéi een alt nees alleng duerch Erëmjongléieren mat Paragraphen, Sue maache kann, déi engem net gehéieren.

Et geet nämlech drëm, e legale Kader hierzestellen, deen et privaten Entreprises erlaabe soll, natierlech Ressourcen vum Asteroiden ze accaparéieren. An dat obwuel sech d'Veereente Natiounen eens sinn, dass de Weltraum der ganzer Menschheet gehéiert an domat net einfach privatiséiert ka ginn.

Ganz dovun ofgesinn huet de Space Mining net wierklech eppes mat der Economie circulaire ze dinn, déi vum selwechte Minister sou grouss annoncéiert gouf. Wou ass de Kreeslaf, wa mer elo schonn iwwer d'Grenze vum der Äerd ewech Ressource siche ginn?

Bei där ganzer Fëscherei a legale Grozonen an Ëmverdeelung vum ënnen no uewen si mir als déi Léink oft déi eenzeg, déi dertëscht fonken. CSV an ADR stëmmen de Gros vum de soziale Kierzungen a Verschlechterunge mat, nach méi wäit vir sti se wann et drëm geet, Kaddoen un déi Räch ze verdeelen. Dat heescht, wa se net grad ze vill mat der Sich no Krëppercher a Kleesercher beschäftigt sinn.

Kolleginnen a Kollegen,

Als Léink hu mir dogéint versicht, eis Hausaufgaben ze maachen. Ech erënnere drun, dass mer dat ganz Joer iwwer eng Campagne iwwer de Logement lafen haten, déi och nach dëst Joer wäert weidergoen, virun allem op Gemengeniveau.

Mir hunn net nëmmen opgewisen, wou de Moment déi gréisst Problemer leien, mä och ganz konkret Propose gemaach, wéi een de Leerstand mobiliséiere an déi batter néideg zousätzlech Wunnunitéite kuerz- a mëttelfristeg schafe kann.

Mir hu Motiounen an de Gemengeréit eraginn fir d'Locataire anstänneg iwwer hier Rechter ze informéieren.

A mir hunn eng Proposition de loi agereecht, an där festgehelt ass, dass deejéinegen, deen eng Immobilienagence an Usproch hält, och d'Provisioun muss bezuelen.

Vu dass et sech dobäi an deene meeschte Fäll ëm de Propriétaire handelt, gëtt de Locataire dovu befreit, e Service ze bezuelen, deen en ni bestallt huet. Dëse Prinzip existéiert an all eisen Nopeschlänner a géing zu enger net ze ënnerschätzender Entlaaschtung vum de Locataire féieren.

Mä de Logement ass just ee vun deene Sujeten, op deene mer geschafft hunn.

Éier eis zwee Deputéiert géint d'Reform vum PAN-Gesetz gestëmmt hunn, well dës an där Versioun Verschlechterungen fir d'Salariéen duerstellt, hu si eng Rëtsch vun Amendementer ausgeschafft, fir e bessert Gläichgewicht tëscht Betrieb a Salarié hierzestellen.

Am Géigenzuch zu der gefuerderter Flexibiliséierung wollte si méi Sécherheet an eng Oarbeschtzäitverkierzung duerchsetzen.

All eenzelt Amendement, dorënner d'Fuerderung no enger 6. Congéswoch, gouf ouni jeeglech Diskussioun vun all deenen anere Parteien verworfen.

Dat ass ëmsou méi verwonnerlech, wann ee weess, dass déi zousätzlech Congéswoch schonn eng Kéier an enger Gesetzespropositioun gefrot gouf, déi vu kengem anere wéi dem deemoolege

gréngen Deputéierte François Bausch virgeluecht gi war. Esou schnell ännere sech d'Prioritéiten vu Gréngen wa se bei deene Grouse matspillen däerfen.

An och dass gëschter den Owend den Etienne Schneider op eemol d'Iddi vun enger Aarbeschtszäitverkierzung ukléngelooss huet, kann no där Geschicht dach keen eescht huelen. De leschte Mount war d'Chance do!

Dat selwecht beim Mindestloun. Déi minimal Erhéijung, mat där sech esou gebrëtzt gouf, war näischt anescht wéi eng gewéinlech Upassung un d'Lounentwécklung.

Domat bleift den onqualifizéierte Mindestloun ënnert där Zomm, déi ee laut STATEC brauch, fir hei am Land en ugemessene Liewensstandard ze hunn.

Lëtzebuerg verstéisst an deem Fall géint déi europäesch Sozialcharta. Dat muss ee sech emol virun Aen halen.

Lëtzebuerg, eent vun deene räichste Länner vun der Welt, dat fräiwëlleg op Steieren a Milliardenhéicht verzicht an no de Stären, pardon, Asteroiden, gräift, eist wonnerbart Lëtzebuerg, schafft 11% working poor. Dat heescht, all 9., deen hei am Land schaffe geet, kann net anstänneg vu sengem Loun liewen.

Fir dat ze änneren, hunn déi Léng eng Motioun an der Chamber agereecht mat den Ziler, de Mindestloun esouwäit ze hiewen, dass een dezent dovun liewe kann, a gläichzäiteg d'Regierung opzefuerderen, en Aktiounsplang géint de Phänomen vun de Working Poor opzestellen.

Et kéint ee mengen, et wier schonn traureg genuch, dass et iwwerhaupt zu sou enger Motioun muss kommen, mä et geet nach besser.

Well ouni iergendeng Diskussioun oder Erklärung hunn d'Deputéiert vun déi Gréng, der LSAP an der DP ausnahmslos géint déi Motioun gestëmmt.

Zwou vun deenen dräi Regierungsparteie mengen heiansdo nach, si kéinte sech als „sozial“ bezeichnen an all deene Leit wëll ech eppes soen, vläicht lauschtert jo deen een oder aneren dono heemlech, wat hei gezielt gouf.

Op verschiddene Sujete kann ee sech net hannert Franktiouns- oder Koalitiounszwang verstoppen. Jiddereen, deen an där Chamber sëtzt, gouf gewielt, an ass individuell responsabel fir seng Aktiounen.

Säit dem 7. Dezember 2016 ass all Deputéierten vun der LSAP a vun déi Gréng dofir matverantwortlech, dass Zéngtausende vu Mënschen hei am Land all Dag schaffe ginn ouni kënne vun hirem Loun ze liewen. That's on you. An dofir gëtt et keng Excuse.

Kolleginnen a Kollegen

Nodeems ech elo sou vill negativ Stëmmung verbreet hunn, muss ech awer och soen: Et war net alles schlecht. Nee, well trotz allem huet d'Zivilgesellschaft dat lescht Joer nees mobiliséiert an ass wéinst soziale Froe massiv op d'Strooss gang.

Ech erënnere un déi riseg Manif am Juni, wou iwwer 9000 Leit fir d'Opwäertung vun de Fleege- a Sozialberuffer op d'Strooss gaange sinn. Ech si frou, dass et zu Lëtzebuerg nees eng Gewerkschaftskultur gëtt, déi et fäerdeg bréngt, massiv ze mobiliséieren, wann et néideg gëtt.

An da kann ech natierlech net aanescht, wéi iwwer CETA an TTIP ze schwätzen.

Et ass bal net ze gleewen, dass et fäerdegbruecht gouf, iwwer déi leschte Joeren en éischter dréchene Sujet wéi Fräihandelsaccorden, esou staark an de Fokus vun der Allgemengheet ze stellen.

Europawäit hunn 3.5 Milliounen Leit eng Petitioun ënnerschriwwen. Ëmmer méi grouss a méi staark ass d'Well vun de CETA-Géigner ginn. 2015 hunn hei zu Lëtzebuerg nach 2000 Leit dogéint manifestéiert, 2016 waren et der schonn iwwer 5000. Zu Berlin eng hallef Millioun.

Europawäit, an och a Kanada, hu sech Gewerkschaften, Ëmweltverbänn, NGOen a Bierger zesumme gedoen fir den neoliberale Kräften entgéintzetrieden. Et ass em net manner gaangen, wéi déi sozial an ekologesch Standarden ze schützen an eis Demokratie net u Multinationalen ze verkafen.

D'Argumenter ware kloer op eiser Säit.

An awer huet d'Europäesch Kommissioun, zesumme mat deenen nationale Regierungen, net opgehale, en Traité, deen d'Gesellschaft kloer net wollt, duerchzeboxen.

Nach besser: Wou dat wallounesch Parlament gedreet huet, säin Accord fir déi belsch Ënnerschreift net ze ginn a soumat dee ganzen Accord platzen ze loossen, do hunn d'Verdeedeger gejëimert, dat wier ondemokratesch.

Wat ass dat fir en Demokratieverständnis?

E puer Technokraten an hier Marionetten an de Regierungen mengen, si wéissten et besser wéi quasi déi komplett europäesch Zivilgesellschaft a probéieren, op Biegen und Brechen en Accord ze forcéieren, deen d'Majoritéit vun de betraffene Leit net wëll.

Mä wann dann een decidéiert, dat net mat ze maachen, dann handelt deen ondemokratesch.

Dat ass lächerlech a weist en trauregt Bild esouwuel vun der europäescher Kommissioun, wéi vun den nationale Regierungen.

Wéi der wësst, gouf CETA awer, trotz deem massive Widerstand, ënnerschriwwen.

Déi lëtzebuergesch Politiklandschaft huet sech op deem Dossier net mat Ruhm bekleckert.

Déi Lénk waren déi eenzeg, déi vun Ufank un a bis zum Schluss kloer géint CETA waren. D'DP, CSV an d'ADR sinn dofir.

D'LSAP huet, dank der Erpressung vum Jean Asselborn, en Accord fir CETA aus der Basis erausgekëddelt an hier Jugend an de Lénke Flillek monddout gemaach.

An déi Gréng? Déi hu sech esou laang gewonn a gekéiert, bis se anscheinend guer net méi woussten, wou lénks a riets ass. Et war en Aarmut.

Mä de Kampf ass nach net eriwwer. Dëst Joer wäert d'Europaparlament iwwer CETA diskutéieren. An och déi national Parlamentarier musse Positioun bezéien, dat heescht déi lëtzebuurger Parteie sinn nach net aus dem Schneider.

Mir wäerte weider sou vill Drock wéi méiglech maachen, fir deen ondemokratesche Wësch dach nach ze stoppen an endlech en Ëmdenken an internationaler Handelspolitik ze forcéieren. Déi lescht Schluecht ass nach net geschloen.

Kolleginnen a Kollegen,

Et ass net déi eenzeg Schluecht, déi mer an de nächste Méint virun eis hunn. An der Chamber wäert deemnächst iwwer den Etat d'Urgence diskutéiert ginn.

D'Regierung well dës wesentlech ausweiden, an domad och d'Méiglechkeet, d'Chamber ze iwwergoen.

Virwand si praktescherweis déi Terrorattacken, vun deenen et der 2016 och leider nees eng Rëtsch gouf.

Dobäi missten eis rezent Fäll, wéi déi krass Iwwerreaktioun vum Erdogan op de Putschversuch an der Tierkei, oder d'Situatioun a Frankräich, eppes Besseres beléiert hunn:

En Noutstand déngt virun allem dozou, onbequem Widderstänn vun der Bevëlkerung fir sozial, demokratesch an ekologesch Causë roueg ze halen.

Net d'Attentater, mä den Etat d'Urgence an d'Muecht, déi doduerch konzentréiert gëtt, sinn déi eigentlech Gefor fir d'Demokratie.

A propos Demokratie: 2017 gëtt d'Joer vun de Wahlen. An Däitschland, Frankräich an Holland sinn dëst Joer Parlamentswahlen. Zu Lëtzebuerg fängt e ganze Wahlzyklus mat de Gemengewahlen un.

Wann ee sech den Trend vun de leschte Joeren ukuckt, kann een dat net op déi liicht Schëller huelen.

Kolleginnen a Kollegen,

Ech gouf gebuer 1990, ee Joer nodeems an Europa d'Mauere gefall sinn. Menger Generatioun gouf eng oppe Welt mat Brécken amplaz vu Stacheldrot versprach.

Mä leider ass d'Entwécklung vun deene leschte Joeren nees an déi aner Richtung verlaf. Et gëtt sech zeréckgezunn amplaz op déi aner duer ze goen. Net nëmmen an den USA an an Israel, och matten an Europa ginn no 25 Joer erëm Mauere gebaut.

Zum Deel, an dat ass de Moment zu Lëtzebuerg de Fall, ginn awer och Hindernisser gesicht, wou eigentlech keng sinn. Sprooche si keng Barrièren, et si Brécken. Wien eng nei Sprooch léiert, léiert eng nei Kultur, eng nei Aart a Weis fir ze denke, kennen.

An deem Sënn hu mir eng riseg Chance. All déi verschidde Sproochen, déi mir op der Strooss héieren, maachen Dieren op. Dieren zu deenen iwwer 170 Nationalitéiten, déi an deem klengen Land hei friddlech zesumme liewen.

Lëtzebuerg war historiesch ëmmer op seng Nopeschlänner ugewisen an huet vun der Sproochevillfalt profitéiert. An dat soll och esou bleiwen.

Mir müssen nees méi openeen duergoen.

Déi Politikverdrossenheet an déi Protestwieler, déi dat postfaktescht Zäitalter ageleet hunn, sinn net ouni Grond a leschter Zäit esou staark ginn.

D'Leit si rosen, si fille sech net eescht geholl, si fille sech zum Deel – haart ausgedréckt – veroarscht. An et ass kee Wonner.

Dat geschitt, wann ee mengt, Demokratie wier en eidelt Wuert, deem keng Konsequenzen ze follegen hunn.

Wa Milliounen Leit hieren Desaccord zu engem Traité ausdrécken, deen dann awer duerchgeboxt gëtt.

Wa se 40 bis 50 Stonnen d'Woch schaffe ginn an um Enn vum Mount net méi wëssen, wéi se de Frigo fëlle sollen.

Wann se gesot kréien, mir missten all spueren an da gesinn, dass Milliarden vun Euro a Banke gepompelt gi fir de Spekulanten hier Primen auszebezuelen.

D'Leit fillen sech veraarscht a se hu Recht.

Mir kënnen net méi zum Business as usual iwergoen. Et ass un eis, d'Roserei an d'Frustratioun an déi richteg Richtung ze lenken.

Mat deene ville Wahlen, déi op eis duerkommen, sti mer un enger Kräizung.

Entweder ännere mer de System, maachen e méi demokratesch, méi sozial, méi ekologesch a méi fair. Oder mir mëschen de Beton a fänken nees un, Maueren ze bauen.

Kolleginnen a Kollegen,

D'Gemengewahle sinn eis Chance. Et si wichteg Wahlen. Zum enge well se den Optakt vum Wahlzyklus duerstellen.

Virun allem awer well et déi demokrateschst an déi inklusivst Wahlen hei am Land sinn. Praktesch jidderee ka matmaachen an decidéieren. An dat ass wichteg, well eng Gesellschaftsverännerung gëtt net vun uewen erof diktéiert, se wüsst um klenge Plang.

Wa mer net wëllen, dass 2017 esou e schäiss Joer wéi dat lescht gëtt, da si mer all gefuerdert. Mir müssen all eis Verantwortung iwuerhuelen an dofir suergen, dass déi Verännerung an déi richteg Richtung verleeft.

Mir müssen d'Frustratioun an Engagement ëmwandelen an eis zesumme staark maache fir sozial an demokratesch Gemengen.

Gemengen, an deenen d'Leit solidaresch matenee liewen amplaz den Noper als Bedrohung ze gesinn.

Gemengen, an deene jidderee Member vun der Gesellschaft ass a keen ausgeschloss gëtt.

Ech sinn zouversichtlech, dass mir, all zesummen, 2017 de Grondsteen dofir leeë kënnen.

An dofir wënschen ech lech alleguer déi néideg Energie an Optimismus, fir no vir ze kucken an d'Maueren, déi um Wee stinn, anzeräissen.

Ech soen lech merci.